

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB PUAN RUSNAH BINTI ALUAI
[TANGGA BATU]**

TARIKH : 2 NOVEMBER 2020 (ISNIN)

SOALAN NO.

Puan Rusnah binti Aluai [Tangga Batu] minta **PERDANA MENTERI** menyatakan sejauh manakah status pelaksanaan pendaftaran pengundi secara automatik bagi warganegara berusia 18 tahun dan program pendidikan pengundi yang sedang dijalankan.

JAWAPAN

**YB DATO' TAKIYUDDIN BIN HASSAN,
MENTERI DI JABATAN PERDANA MENTERI (PARLIMEN DAN
UNDANG-UNDANG)**

Tuan Yang di-Pertua,

1. Untuk makluman Ahli Yang Berhormat, Suruhanjaya Pilihan Raya (SPR) sedang dalam persiapan untuk melaksanakan umur kelayakan pengundi 18 tahun dan pendaftaran pemilih secara automatik berdasarkan kepada pindaan Perkara 119(4) Perlembagaan Persekutuan yang telah diluluskan oleh Parlimen pada Mesyuarat Kedua Penggal Kedua Parlimen Keempat Belas. Persiapan yang sedang dilaksanakan oleh SPR adalah meliputi penyediaan **pindaan kepada Peraturan-Peraturan Pilihan Raya (Pendaftaran Pemilih) 2002** dan **undang-undang lain yang berkaitan, penyediaan standard operating procedures (SOP)** dan **penyediaan sistem dan infrastruktur** bagi pelaksanaan umur kelayakan pengundi 18 tahun dan pendaftaran pemilih secara automatik.

2. Bagi maksud membantu SPR dalam menyediakan SOP pelaksanaan pendaftaran pemilih secara automatik ini, SPR telah mengadakan **beberapa sesi libat urus** bersama beberapa jabatan/agensi Kerajaan seperti Unit Pemodenan Tadbiran dan Perancangan Pengurusan Malaysia (MAMPU), Jabatan Perdana Menteri; Kementerian Dalam Negeri; Jabatan Pendaftaran Negara (JPN); Jabatan Penjara Malaysia; Pejabat Ketua Pendaftar Mahkamah; Kementerian Kesihatan Malaysia; Angkatan Tentera Malaysia; dan Polis DiRaja Malaysia.
3. SPR juga telah mengadakan beberapa sesi libat urus seperti berikut:
 - (i) Sesi Libat Urus Bersama Parti-Parti Politik Dari Blok Kerajaan Dan Blok Pembangkang (Bipartisan) Berhubung Pelaksanaan Umur Pengundi dan Calon 18 Tahun serta Pendaftaran Pemilih Secara Automatik pada 3 Oktober 2019;
 - (ii) Sesi Libat Urus Dengan Pertubuhan-Pertubuhan Bukan Kerajaan dan Parti-Parti Politik Negeri Sarawak pada 26 November 2019; dan
 - (iii) Sesi Libat Urus Dengan Pertubuhan-Pertubuhan Bukan Kerajaan dan Parti-Parti Politik Negeri Sabah pada 3 Disember 2019.
4. Melalui penganjuran sesi-sesi libat urus tersebut, SPR telah memberi penerangan mengenai perancangan pelaksanaan pindaan undang-undang yang telah diluluskan serta mendapatkan maklum balas dan pandangan daripada semua pihak.
5. Di samping itu, SPR juga sedang bekerjasama dengan JPN melalui **Jawatankuasa Taskforce SPR dan JPN** dalam persiapan melaksanakan pendaftaran pemilih secara automatik dan urusan-urusan lain yang berkaitan. SPR menjangkakan semua persiapan yang sedang diambil tindakan oleh SPR akan dapat disiapkan dalam tempoh **18 hingga 24 bulan dari tarikh kelulusan pindaan oleh Dewan Negara pada 25 Julai 2019**. Sehubungan itu, jangkaan tarikh pelaksanaan tersebut adalah selewat-lewatnya pada bulan **Julai 2021**.

6. Dari segi program Pendidikan pengundi pula, SPR melalui Akademi Pilihan Raya (APR) telah melaksanakan Program Pendidikan Pengundi (*Voter Education*) sejak tahun 2017 bagi mendekati warganegara khususnya warga belia. Program ini bertujuan untuk memberi kefahaman terhadap proses pilihan raya yang dijalankan di Malaysia di samping menjawab isu-isu yang sering dibangkitkan semasa pilihan raya. Dengan kesedaran dan kefahaman tentang proses demokrasi dan pilihan raya, maka diharapkan mereka akan berminat untuk mendaftar sebagai pemilih dan keluar mengundi semasa pilihan raya.
7. Pada tahun 2017, sebanyak 102 program pendidikan pengundi telah berjaya diadakan dengan penyertaan seramai **31,355** peserta. Pada tahun 2018, sebanyak 126 program telah berjaya diadakan dengan penyertaan seramai 27,585 peserta termasuk 4,563 peserta daripada 25 buah MRSM seluruh negara. Manakala pada tahun 2019, SPR telah menganjurkan sebanyak 284 program dengan penyertaan seramai 95,368 peserta termasuk 29,991 peserta dari 133 sekolah rendah, menengah dan MRSM seluruh negara.
8. Pada tahun 2020, program ini telah diperluaskan lagi di mana SPR telah menjalankan kerjasama strategik bersama Kementerian Pendidikan Malaysia (KPM) bagi pelaksanaan Program Pendidikan Pengundi (Sekolah Menengah dan Rendah) di seluruh negara. Walau bagaimanapun, Semua Program Pendidikan Pengundi tahun 2020 terpaksa ditangguhkan pelaksanaannya berikutan Perintah Kawalan Pergerakan yang diumumkan oleh Kerajaan bagi mengekang penularan pandemik Covid-19 yang melanda seluruh dunia.

Sekian, terima kasih.